

程

雲間據目抄序



往余受業博士讀諸家草至范叔子一家言汪洋自恣軼
輓近而遊高明有味乎其言之哉已余對公車邂逅存吾
丁明府稱述叔子義甚高放達而多奇好脩而倬詭與其
文合私心愈益向往比令海上得交叔子歡則見其人森森
乎如開玉府僊僊乎若乘白雲而行廣漠蓋非天地間恒
有也未幾余以苦次去叔子送余黃龍之浦慇懃贈言把
衣惜別欷歔久之吳中信多奇士第得叔子無論其他乃

今令秦中目皆僨父拊缶而歌嗚嗚當是時思一見叔子
若醴泉甘露安可得也而公覲章丈適遺其所撰雲間據
目抄屬余弁諸簡首夫空谷聞足音輒喜矧讀其書奚啻
蹙然欣躍而爲之序按據目抄凡五紀曰雲間者就雲間
一郡之事言之也曰據目者爲一郡實錄必目所覩記則
書之也叔子生於嘉靖庚子自十齡以外涉世凡四十餘
年其間人文之高下習尚之污隆財賦之增減與夫災祥
薦至土木繁興其爲時屢遷其爲變不一顧郡乘闕缺久

矣不有紀述百世而下徵文獻采風俗者何以攷諸此任
世道者所宜深念也叔子早謝學宮與世齟齬其負抱瑰
瑋不獲自試遠迹江河放情魚鳥有慨於衷寓目卽書其
事核其詞辨其論侃侃博綜一郡之典章而昭數十年之
鑒戒槩於立言君子叔子信不朽哉詰士懷奇抱異不得
感會雲龍遭佐明主樹竹帛之勲而徒循尺寸以希有聞
曷若托千秋而垂大業失馬之喻叔子辨之矣先是所著
有空明子八篇詆訾當世或病其過激余謂叔子憤世之

士遇事感發不能避諸筆端然皆天下之公論若以意愛
憎妄濫好詞曲加醜詆叔子無是也尚論者諒之肯

萬曆癸巳孟春之旦賜進士出身知三原縣事獲嘉高進
孝拜撰

雲間據目抄叙

在正德壬申之歲顧文僖公修松江府誌垂今八十年來
滄桑轉徙變態何極寥寥烏有今上萬曆癸巳春李郡侯
思弦先生雅好文重士有古陳仲舉風席未煖身先式廬
而問罷乘于張子重華重華疏境內名士數人爲前茅蓋
范叔子其白眉云侯乃預求遺書飭館局將涓吉造請共
成嘉惠甚盛舉也亡何侯忽以吏議去事遂寢張子仰天
歛歎曰已矣乎松將爲草莽之國乎詎意叔子已搯狐筆

裒然有作矣張子披之舞蹈不寐而問叔子曰此爲志可耳曷言乎抄曷言乎據日也叔子曰吾產自嘉靖之庚子至庚戌得十年輒能讀古人書談天述事迄乎今二毛且疹疹是編者據吾目所覩記抄之示不妄也而何敢以當志也抄凡五紀紀人物則名賢大良翱翔皇路俠客文人龍雲豹霧紀祥異則河伯著微山靈獻巧吉凶互藏著龜先效紀土木則天神聳剝藥王豎廬竹林栗里已非故墟紀賦役則踐更靡節民生拮据十室九空鳩巢計拙貴介

之珍蒼赤之血紀風俗則稜稜者員渾渾者雕衣冠市道視民以佻粉黛街頭覲顏招搖萬錢一箸百味一朝夫時異物遷如江如河乃欲塗黔首之耳目而愚來禳法戒謂何張子歛手北面再拜曰吾爲松人士謝叔子夫昔文禧公身履青漢猶然歷三郡守始底厥績李侯銳意振刷天且敘其成盛事難再若此叔子擔此大寄闡然授簡如衣有領如網有綱異日好事者重修故牒一提挈之文獻不足徵乎此以諸郡守所甚艱者叔子取給一心腑間以數

十年未了典型一旦鍊五色石補天缺嗟嗟松也孟堅逞
膽茂先埒博如叔子幾人孕珠璣於丘壑寓衮鉞於蒿萊
如叔子幾人叔子弱冠爲名諸生每校藝必上列竟不悅
以七尺聽人短長蟬蛻縫衣獨喜持三寸兔毛用享千
秋遲
蓬蓽而居而與文禧木天金馬齊軌疾驅叔子其不朽矣
叔子叔子不佞何情效王中卽着膩顏恰綸隨鄭康成車
後也

滎人張重華虞侯撰

范叔子傳

蓋余讀空明子始以爲齊諧既以爲月旦最後以爲禱杌
則咋指而嗟曰夫々不鑿國武子哉奈何獨免居無何空
明子幾不免也以居閒迺免嗚呼此非有天幸與物色其
人而得之諸宜甫家相對甚驩於時空明子年五十矣預
卜生壙自述其生平大略俾余傳之余卜生壙時年亦五
十矣空明子遠相若故不辭而作范叔子傳

范叔子者華亭之漕涇人濱海而家其先蓋出鳩夷子皮

楊夷去越之陶曰陶朱公累致千金故其子孫多受賈叔
子之先亦受賈其受儒自叔子父兄始叔子承父兄之業
迺亦受儒；生言類多糠粃糟粕乎叔子意不屑取立索
古文博士家言兩習之而亦兩善然每試輒不中程里中
經生不識也獨宜典萬文恭廣德寧孝廉識之是時宜典
令丁君為子弟卜名師急走幣華亭延叔子一見遂為莫
逆宜典人知令有重客爭欲趨下風叔子不顧日坐絳帷
談蠹魚不丙夜不休矣以是令益重之既乘廣柳歸而猶

延致叔子置家塾凡三年然後歸令家姚江姚江之士北
面受經者鱗集得其指授相繼脫穎而去叔子矜猶然青
青耳試又不中程遂罷去不復試隱居余山著書數萬言
號空明子也空明子雖幾賈禍而竟以此見重於世上海
令顏公高公並岳；強項而皆推轂叔子稱為奇雋旌旄
鐘鼓旁午于門叔子一棧報謁而已他無所請二公益重
叔子如丁公也叔子對客善詼諧談諷雜出類東方曼倩
至隱德細行則凜；不敢踰癸酉應京兆試宿逆旅主人

即中槩心之女穴隙而窺叔子叔子目不為忤嘗絕食突
無烟者三日矣方與客博爭道客聞後房啼餓殺皆散去
已而有餽粟者聞知為宋光祿趣家人受之曰此非陶胡
奴米若輩腹果然矣叔子意漠如也慕魯仲連田光先生
之為人慷慨赴義不翅飢渴海上中倭後柱後惠文以軍
典法坐諸失事者叔子偕其曹以片言釋之諸人羅拜叔
子叔子曰吾哀諸公蹈斧鑕耳豈望德我耶其排難解紛
類若此叔子生時毋顧夫人苦熱夜坐庭中天忽裂如巨

目光燁々射顧夫人身夫人竊祝之曰生兒必有文已生
叔子果以文起叔子名廷故更名濂著書數十篇行于世
輒著據目抄有補郡乘而人尤膾炙空明子

王先生曰叔子生有異徵當大貴竟老一逢以此曷以解
造化不誠小兒耶夫造化能小兒我亦能小兒造化叔子
下云乎造化厄我以賤我無意乘軒也造化厄我以貧我
無意程鄭也造化厄我以惇獨我無意姜被梁案也若然
造化之于叔子孰為小兒否余不能知當歸之太虛

附家傳

昔史記成而龍門之裔亦顯漢書著而於菟之叙亦詳偉哉先民寔示人以則欵予本單門敢希文獻然青蠅附驥自足千里矧奕葉允基寔惟我父兄在故不自揣作范氏家傳處士公諱欽字周臣號守齋先世多受賈至先大父毅菴公始令公受經于馮廷尉期以文顯廷尉深器之會毅菴公暴卒毅庵公跣地任俠生平睚眦中人不少故里中豪爭甘心處士公者遂廢學日手家政調儻有心計辨

若懸河與豪人鬪者凡二十年卒不為屈然坐是囊橐如
洗而是時公有子為今孝廉公廷言及不肖廷啟皆疑
膝前矣先是曾大父葬地有堪輿家過其下曰佳哉坎離
必有二闡人起其後公意在兩子即杜門手一編課之以
家濱海之名師故于文人學士輒傾心焉有葉生者為督
學黃公所重一日策馬遊金山道中倉皇投宿公着白帽
追留之身自行酒而毋顧孺人復割屋剝薦以供行厨因
見余兄弟葉生大加賞異而去自是課益力不丙夜不休

島寇起賊刃而前者去公居百步許公猶端坐不為動嚴
課如初其薦志如此尋孝廉公補博士試輒高等廩學宮
有聲而不肖亦以博士繼起公始陶然自憫日與二三父
老逍遙足志然性端方寡合鄰有余秀州先生即余人物
紀中名采者獨嚴重公時與譚說世外其志趣可知公形
貌短小而氣雄萬夫安貧樂道有古人風胷中不設城府
嘗面折人過不少假蚤歲廢學而識量暗與道俱當規畫
時事及品藻人倫雖薦紳學士不能奪也故馮廷尉嘗稱

公為布衣之雄云

贊曰公起濱海一旦釋什一而事詩書外之師承內罹塵
甌中值兵燹肆警而篤志靡衰卒有成立豈不謂難哉然
竟蚤世即孝廉公以公教顯矣而弗及見也乃至不肖若
沉若浮終成廢棄則并公初志而失之余故不覺淚瀾翻
落紙上語曰仁者必有後太史公曰李氏名敗而隴西之
士深以為恥夫是二者其在吾子孫將安所擇哉
孝廉公名廷言字君直號訥齋處士公艱舉子年幾四十

始生公驚姜之夕有中表李君者夢處士公絳衣霞冠周
行里中即晨起報處士公曰必有佳兒果誕公子沉静有
志操不逐群兒嬉戲獨喜受處士公教日記千言足不窺
戶而是時不肖雖為童時便厭薄舉子執喜黏風竿騎竹
馬跳梁于塵飯塗羹間飄風去矣以故公弱冠即業成補
博士弟子一日從處士公謁馮廷尉奏文驚座上客廷尉
大咤曰而有子不貧矣即以從女妻焉尋督學耿公試冠諸
生期公一第且芥取竟以數奇久因公車間時公父母皆

春秋高自傷不能及處士公在得一第以伸祿養端居恒自嘆喑深念若無所容所得教授弟子羔鴈輒以供甘毳逮公父母相繼不諱雖家徒壁立而窀穸皆如禮有兩姊寡而貧公皆脫粟贍之人以為有李英國之風云己卯領應天鄉薦而吳中稍列仕路者類易憑藉起家公獨不屑也日杜門掃一室以身為蠹魚萬卷中人有乞公居間者輒謝去以故蕭然布素居無一椽郡邑大夫廉公高潔靡不交口嘆公不可及上海令高公嘗語予比公于邴根矩

井大春之流其為人推重類如此公既以文學行誼卓絕一時故士出公門下者如馮孝廉大受施孝廉大經殷武部廷樞三四輩咸後先脫穎去皆以清修雅望為里閭所推人謂得公之教居多公于書上自六經子史旁及陰陽禽道不歷覽猶長于經濟蓋公自期待者甚宏欲大用於世以求無負處士公教而至今猶厄春官試識者以為無天云

贊曰余兄弟咸佩服處士公教而孝廉公生平恭謹慕先

世文正忠宣之為人余則稍佐以諧誕時稱說陶朱張
祿然二公皆揣摩之士余雖工其術無當而文正忠宣之
業方與時宜此不可以見公識量加余數等哉昔吾郡之
先以兄弟並名者有二陸然謝太傅竟以盧志之對卜其
優劣倘世有太傅定余兄弟余安所逃劣矣

雲間據目抄卷之一

華亭范

濂叔子著

第六世姪孫聯枝鹿民氏重校



紀人物

昔者太史公謂由光義甚高獨惜其文詞不少概見而孤
竹二子乃幸其賢於仲尼聲施後世於乎其旨深哉故豪
傑之士能以功名表見彪炳史冊此所謂才與遇合者也
其有數奇運蹇特立獨行或功與勢違或名與時背如屈

子自沉伍胥自剄甚且困厄蓬戶曾不得借君侯階前盈尺之地一吐其奇而費志以歿若此類者亦可悲矣向徵逸史氏聞發幽潛以併載筆異日或有採風者尚論其人何以稽焉故予紀四十年來郡以內所睹記人士皆就其不得志於時者捋拾行畧而次第之以俟後之君子庶無由光之憾云

吳稷

稷字舜弼號石湖公穎敏敦慤年十五居父喪戚而有禮

治經屬文精勤雅贍舉正德甲戌進士授金華府推官時蘭谿章文懿公家居公虛已質疑政學並進會永康右姓馬甲辱其邑令公據法繩之拂上官意移調惠州得與魏莊渠李谷坪兩公切磋守官米糲裁省冗役冗費暑月行縣疏釋繫囚置規過櫃於郡門以通民隱立保甲法於七邑以懲奸宄中丞聶榮襄移文諸郡期一一如吳惠州有游豐令以墨黥猶治事公露檄馳使逐之令為按君鄉人乃大迂不得薦遷荆府左長史服徐改徽府公皆不薄其

官進賢王箴共憲賦以寓規誨致仕歸老於東城之垆非公事跡不履城市有司延鄉飲大賓間一赴之服膺莊渠谷坪兩公求仁致知之學四十餘年潛思實踐間有疑信者則與陸宗伯平泉唐中丞順之叅互演証年逾大耋猶著衍壽編以自勗卒後數月督學耿公登堂奠謁旋採與評秩祀鄉賢祠所著有自得園稿宦遊稿石湖漫稿破愚錄史綱纂要藏於家而皇明正學編尤裨道脉云

馮恩

恩字子仁號南江嘉靖丙戌進士以行人出勞兩廣大帥王文成公因薦束脩為弟子文成公甚器之已擢御史分司留臺先與刑曹抗論執訊獄牒體尊疏論留守魏公不得越江役衛卒時汪御史大夫鉉悞而險能窺伺上旨沮折其屬又阿諛時相數更職守自固公疏論之有身軀不滿五尺罪惡已貫四凶之句會上方喜新貴人議分建南北郊又欲令皇后出蠶北郊而摘其不合者以邪徒闡之中外惴惴公獨抗疏援古親蠶郊祭之禮極陳時政乖違

災變勸上速停二議開言路且以堯舜之用元凱而唐宋之徇林甫安石為戒當公具草時分且得逮後俱報聞公益感奮會彗星見東井遂抗疏論汪鉉為腹心彗并及二相臣宜亟罷又倣范希文百官圖例悉品諸大臣得失詞甚峭厲上怒甚馳緹騎逮之下詔獄適汪大夫遷太宰以例會審南闕門汪執筆令校卒持公轉膝面之公即起立不跪辨甚強項汪遂以上言大臣德政律署公情真法當斬公挺身出不顧觀者皆嘖嘖嘆曰是御史鐵膝鐵口鐵

胆鐵骨相傳為四鐵御史且錄其語流播中外及冬當就法有遺公藥者公曰御史陳事不當惟有伏歐刀都市伸明主三尺耳何以藥為後得減戍雷州遇赦歸雷人祀之十賢堂以配宋寇準李光華公材大早廢居恒慷慨謂猶可為德於一鄉出橐資買瘠田募貧人佃之教以計然之策會有天幸傍畝益拓所入漸廣乃推贍三族之貧者若干人又贍布衣交貧者若干人會倭亂有士女避徙者公皆授廬傳餐以濟之大饑疫煮粥劑藥所全活甚衆穆宗

初御極旌言事者公年已七十餘矣銓曹難其老疏進大理寺丞再加朝列大夫死之日弔者如市郡邑大夫請祀鄉賢著有藹菑集行於世

周思兼

思兼字叔夜號萊峰公年十八為諸生才氣橫溢下筆千言不能休常為古詩歌陸文裕公見而奇之曰吾年二十發解時不辦生此語舉嘉靖丁未進士授平度州知州多惠政時藩府閹縱奴奪民田有僉事某者捶其奴斃之獄

閹嗾王奏之將擬重辟當道檄公再訊僉事竟得如故官旁郡饑民掠食幕府將加勦公曰此輩赤子餓求食耳柰何激之為變亟作小木牌數千為招緝語散置四郊皆得就撫為良民銓曹考公治行最擢繕部員外督陝清源州人遮道哭送立祠生祀之在清源會河勢將決公為禱于神募民囊土築堤身立赤日中督之堤成三日而秋漲大發民得無魚已擢湖廣僉事除宗庶五將軍豪橫殲巨盜劉某於江黃間聲稱尤籍會丁內艱前後哀毀雞骨服除

竟不復仕優游林泉者逾七年足跡不入官府屬歲饑食
指不給閉門食貧終不為人關說一事時或操小艇攜圖
書數卷遊吳越佳山水間絕不令人知其他隱德不可勝
紀廟堂方大用公超拜廣西督學副使竟遭脾疾卒朝野
惋歎諸生請祀學宮因私謚公于鄉曰貞靖先生公文駕軼
蘇長公詩歌類太白已稍出入歐曾傳宗王孟善行草兼
工小畫所著有西齋日錄學道紀言及周叔夜集行於世
范叔子曰陳仲子三咽井李以名行自持亦苦矣孟軻氏

猶斥其矯廉何刻哉晚世薦紳營營逐利雖有陶朱猗頓
之富日事干請如飢犬之乞憐甘為有司褻慢當此之時
得一陳仲子者豈不猶然稱巨擘哉迺有開戶食貧如萊
峰先生者在也嗟嗟哲人既逝我將安放其先生之謂與

包節

節字元達號蒙泉舉嘉靖壬辰進士公孝友天植忠義性
成秉道嫉邪毫髮不假兩使滇閩再按湖南能令豪右權
奸屏跡歛手風裁凜然會忤閹豎誣以震驚陵寢謫戍在

浪衛者十有二年聞母弟殞謝哀毀而卒識者惋歎公文
宗西京五七言詩有開元風骨皆窮而益工莫方伯如忠
比之虞卿云所著有包侍御集六卷苑詩類選三十卷行
於世

范叔子曰節與弟孝時稱兩包即余同里人也家君嘖
道其少年讀書事甚悉然兩公皆奇才博學相繼脫穎並
為國朝名御史迹其一時詎不赫々稱盛哉乃兄以戍客
死弟以病歿拆竟不得收善後遐齡之慶豈亦天道忌盈

與此昔人所以喻塞翁也邇者輕猥謏劣之子幸廩學宮
遂多盛滿嗚呼孔子傷器小有旨哉

張之象

之象字玄超號玉屋公為人體貌樞僂如不勝衣而剛腸
勁氣獨立物表平居議論臧否務持正不阿與人交不以
盛衰為軒輊常憤時俗趨炎乃反傳咸意著叩頭蟲賦以
見志單門後進少有拔俗之韻必多方延譽其敗名傷檢
者即顯赫亦擯斥之不少假色有董氏者其後輩貴盛慙

直而尊行其故擣杓人偃然執分自倨其後輩不能平遂指為張姓訟而斥焉公心異之為賦一詩云秦延未省非張祿漢室原知是董生相傳以為絕倒後訊者竟據此剖其事公富於學故其詩之工緻多類此自謂一生不侮暗室常渡泖中流風惡舟人皆失色公神宇恬穆口占一絕有暗想生平何所懺三辰晏起一科頭之句公既性不偶俗獨喜閉戶著書冬夏不輟其詩爾雅冲淡有魏晉風其文闕深奧行出入東西京床頭惟擁千卷終身不識銖兩

會計以故家徒壁立間從諸貴人游或羅綺滿座公獨敝衫竹躡披襟命塵旁若無人蓋公所挾持者最重不在世味中也海內名卿鉅公聞名願交者望若景星四明豐存禮豪士也讀公文咤曰天生老豐何復生此子邢子愿東魯逸才生稍晚意公已化去後行部至松喜公尚在數訪之里巷為置買山錢若干其他先輩若金陵顧華玉璘許仲昭穀吳門蔡九達羽文徵仲徵明王履吉寵彭孔嘉年吾鄉徐伯臣獻忠何元朗良俊董子元宜陽皆與公莫逆

交公常稍從祿仕為浙藩幕即謝去卜築細林山麓其地
多怪石清泉煙樓月榭叢竹茂林及諸仙釋名蹟苔封蘚
沒舊無物色者公一一題咏山靈遂為生氣所著書及纂
輯先代書不下千卷藏於家公有子諱雲門登隆慶庚午
鄉薦先公卒孫齊顏弱冠領萬曆己卯鄉薦奇才潔行卓
犖一時人以為公積厚之報云

董宜陽

宜陽字子元先世汴人南渡徙居上海吳會又徙居沙岡

人稱紫岡先生復自號七林居士公於書無所不窺獨究
心當代典故為一郡文獻游太學名重都下屢試弗第遂
棄去制舉業工古文詞詩法高岑晚嗜元白體文法先秦
間出入曾王家楷書做虞永興行草法智永生平嗜好惟
書史古石刻名帖日坐一室手丹鉛校勘至丙夜不休與
同里張玄超徐伯臣何元朗號稱四賢所遊盡海內名人
即碩司寇璘文待詔徵明許奉常穀輦卓然以文名家者
亦皆雅重公尤敦尚行誼與弟宜旭分產先為文泣告先

祠推故產悉讓弟而身任一切門外事先廷尉有故人開
府婁江公奉書往謁開府迎公甚恭幕下客願以金錢為
壽居間有請公面咤曰若視我何如人哉拒不納故家世
無仕而落落如寒素云所著有名臣琬琰通錄金石錄雲
間詩文選略先哲金石錄近代人物志雲間百詠松誌補
遺上海紀變中園記金石林諸書藏於家

范叔子曰予讀唐史見溫彥弘將改葬祖父筮者曰若葬
茲土當害兄而福弟彥弘曰若得家弟永康我當含笑入

地矣嗟々兄弟之於人大矣哉古人何乃不有其身而有
其弟歟紫岡先生以文學名不足多獨其友愛宜旭弟為
文告廟推讓故產此豈晚世人情所能耶庶幾與彥弘相
上下者乎

徐獻忠

獻忠字伯臣號長谷公學博才高日讀書盈寸為文深厚
典據大類子長間襍東京所論詩五言重魏晉七言止取
高岑而上律止於大曆其自為詩沉鬱彩秀出入諸名家

尤長於賦如布賦一篇憫念松人愁苦周悉詳盡能令循
吏讀之酸鼻生平無他嗜好惟著書自娛有金石文樂府
吳興掌故序唐詩品水品四明半政錄洪範或問春秋
紀傳錄大易心印四書本義及分節叅同契大地圖衍義
山房九笈三江水利攷等各自為集藏於家真草書法蘇
趙為世所珍由鄉舉授奉化令以節氣自持不能折腰俗
吏時同鄉沈鳳峯愷為副使公與節推楊樞為屬吏樞先
謁愷命侍坐適公至趨南坐不少遜愷意不懌公怒曰

爾豈以我不能為陶彭澤耶後公坐誣掛冠愷寔陰擠焉
公厭松俗侈靡卜居雲川却侯袁汝是重公學行每嘆峰
泖佳麗不能容徐公高隱為恨云

何良俊

良俊字元朗號柘湖公早歲從經師遊即厭棄制舉義恥
著古文博綜九流研味四始兼包經濟思效一官竟以數
奇僅拔貢太學宰相憐其才起家拜南翰林孔目甫考滿
即謝官歸縱浪煙霞水石間殫志著作文法劉向馬遷詩

宗蘇李而近體出高岑凡宴息處皆名四友齋四友者維
摩詰莊生白樂天與公為四也公自為記及書屏示客與
王佐輔趙中丞兩書皆公生平實錄晚著聲伎絲竹寢興
必先奏樂非過自奉乃其所期待者不淺耳與弟進士公
良傳時稱兩何所著有何翰林集何氏語林四友齋叢說
行於世

范子叔曰張董徐何雲間所稱四賢也其以文章行誼倡
和一時詎不偉哉今此四賢者出入金馬門為玉堂仙子

誰曰不宜乃幸則為折腰吏不幸則為老縫掖使天而可
問乎此曷故焉而魏科膺仕送、被之譴才涼德之夫噫
茲所謂命耶

馮行可

行可字見卿號勅齋即御史公恩長子當御史下獄時公
甫十三歲即伏闕上書白寃狀括髮短後衣釐、長安街
中見一要官輦過即攀跪泣請其詞絕酸楚不忍聞皆掩
耳從昇者疾過之又二載會冬事迫乃刺血書疏叩關大

畧言臣父恩幼而失怙母吳含飴哺之長成以有今日不
幸私憂過計欲為陛下作吠奸之犬而頓忘逆鱗之戒遽
陷大辟竊念祖母吳年已八十餘憂傷之深僅一氣息臣
父今日死祖母當以今日死臣父明日死祖母即以明日
死臣父死臣祖母復死臣竊然一孤寧得不死惟冀陛下
哀憐之縛臣置辟而赦臣父得以苟延母子二人之命臣
下僂臣不傷臣心臣被僂不傷陛下法謹延頸俟白刃納
陳經見而憐之為封上有旨法司更審御史公遂得減

戊雷州海內翕然稱馮公父死忠子死孝云甫弱冠舉嘉
靖庚子鄉薦家居時佐御史公為義已丁母金孺人喪䟽
食不入內者三載穆廟初部使者列上公前事特旌為孝
子表其廬公博學瞻文竟以數蹙久困公車謁選得光祿
署正擢應天府通判所至有惠政而清操若冰藥人稱不
媿馮御史兒已擢二守致政歸杜門養高絕無私謁日以
孝弟之道誨其子弟即鄉里後進皆仰公為師表部使者
屢䟽起用公不就朝廷晉公爵秩復旌其門時稱異數云

有子大受領萬曆己卯鄉薦方以詩文雄傑時流且日樹
隱德故馮氏濟美遂為東吳之冠

李豫亨

豫亨字元薦少穎異十餘齡從父海樓公宦遊湖襄會剪
大鴻寇公從旁籌策一座皆驚客歸補郡博士已入貴為
國子生卒不第授鴻臚寺序班時新鄭當國公條上國計
三議新鄭深器之欲大用公公無宦志歸築室西湖上與
龍溪王公講學多從遊者抵武夷生徒益衆公自五經子

史旁及山川象緯兵農財賦醫卜堪輿暨二氏之學咸窺
精蘊所著書有推蓬寤語自樂編三事邈真格致明辨自
樂寫詩草梅花百咏所輯書有寒谷回音藥欄春意廣記
攬玄珊瑚枝總若干卷工署書行草具體趙承旨有石刻
行於世

范叔子曰國朝以制義取士，即長於制義亦卑，腐語
耳幸與的者曰甲科輒肆尊大令不由此塗進雖周孔之
德游夏之學亦敝帚矣元薦窮百氏家言不下五車竟阨

於一第俗吏猶然賞即日之噫賞即豈皆讀元薦腹中書者耶彼俗吏何以當甲科也

楊允繩

允繩字翼少號柳齋舉嘉靖庚子鄉試辛丑下第往受業唐荆川先生講良知之學日置黑白土圈以志善惡其精進力行類如此甲辰成進士以行人擢兵科給事中時分宜當國公首上簡輔臣廣錄用以隆治化疏尋劾勲臣本兵之不職者又歷上拯弊安攘諸疏言中理窾已奉旨冊

封河南王府遂乞歸計不復出會倭亂憤激時事趨駕還朝即抗疏數千言內及閣部大臣餽送不貲蓋指相嵩言也嵩銜之適巡視光祿有寺丞胡膏者嵩客也公廉其貪汚虛冒物價狀劾之下法司嵩既無計免膏又切齒公乃嗾膏反誣公譏訕嵩從中灼之世廟震怒廷杖下錦衣獄擬絞在繫五年嵩患之因星隕如雨占者以天示變咎在臣下不忠遂列公名上請行刑以應康申十月朔公遂赴西市朝野冤之先是公家居性峭直無所避一郡佐峻刑

敲朴適公過聞號呼聲立假其榜給云將以懲奴輩不當
意者佐為悞息郡侯方廉送別公亟言志在退休公正色
斥之曰公不欲做官元旦不當晨起姚醫士門賀節矣姚
故徐司空達齋客也方面頰不憚而退蒿子世蕃鷲縱邀
公飲有二客皆朝紳不速而至世蕃令兩童子持朱墨筆
點其面為闖席者戒公默不語世蕃深啣之竟以此賈禍
語云太剛則折楊公有馬公有子曰應祈性至孝當公下
獄時前後三草疏最後走平坡山中劬靈芝三本將獻上

請代父死會世廟怒不測為母黃孺人所阻乃身服皂隸
衣行長安街毀容骨立念未舉子姑以藥餌自扶已得今
孝廉公忠裕甫三日覘知給諫公禍不解入獄永訣絕食
而卒聞者莫不失聲越三年分宜雜作又四年穆宗御極
旌諸言事者贈給諫公奉議大夫光祿寺少卿諭祭一壇
廕忠裕為國子生又用李都諫用敬言逮膏抵死迄萬曆戊
子忠裕領鄉薦聲籍士林人以為忠孝之報
范叔子曰上山不避猛虎下海不畏毒蛟烈士不當如是

耶諒哉吳中丞之銘公也雖然謂天有知何刑公之生而
又矻其子謂天無知何錄公之歿而又榮其孫豈其理之
不可信者耶雖然不殺公忠不盈嵩惡嵩惡彌盈公忠彌
著高也遺穢公也垂芳孰謂天之成全公者無意哉抑齋在
告時有目者對陸宗伯曰楊公為門下同年其命當死國
難公勿勸之出宗伯曰此公已無宦志安有此日而言誤
矣一日楊公忽投刺別宗伯還朝宗伯心動且知公意已
決不可復阻猶幸星術未必奇驗也已聞變宗伯時為憮

然悔不因日者言力挽之

龔情

情字善甫號方川公生而穎喆髫髻能日誦記千言舉嘉
靖癸丑進士授行人奉使景寧藩邸峻却餽遺擢禮科給
事中值歲議軍興諸道赤白囊旁午警報歲數失稔公首
疏飭備邊預儲蓄蠲南北額外之徵均兵餉以蘇偏累復
疏止詔取太倉銀兩省中推公敢言會勘伊庶人不法狀
忤當事者指謫貳德清尋歷陞南虞部郎報罷公少日聘

韓氏已而其女遘廢疾或諷公改圖公不聽後其女亡始
議婚其大行端謹類如此性喜博古屬文著作宗韓非子
有撮殘稿藏於家

龔愷

愷字次元號全山第嘉靖丁未進士即給諫公從弟時稱
兩龔授慈谿令視職廉慎治稱神明去縣日民攀留者送
道至截鐙去入臺試御史會咸寧侯仇鸞倡馬市公首署
疏論之杖闕下得不死已按西粵吏不職者先望風去尋

列靖江王不法狀疏止大征粵寇為當事者忌出為山東
叅議多惠政晉湖廣副使以疾作引歸杜門不事私謁郡
邑大夫造請必為指詰疵政靡不屈服公雖峭直清嚴待
族黨外戚務敦厚道識者稱公為古之遺直竟以考察降
調交口寬之

范叔子曰吾却自嘉隆以來其以兄弟擬魏科為望族者
何比；耶獨兩龔在臺諫並謬；有聲居鄉亦稱兩君子
即以功名相終始矣媿焉乃竟坐誣掛冠而家聲亦不永

世身歿未幾子孫多寥落鮮克自振者豈盈虛之數有定
耶語云天道無親常與善人豈欺我耶

王相堯

相堯字師舜號容齋公生而岐嶷吐音若鐘早歲即為陸
文裕公所器補博士名鵠起已入貲為上舍公於書無所
不窺尤究心國朝典故及濂洛關閩之學時分宜為祭酒
叩公經濟迎刃而解故於諸生中絕憐愛之一日選從此
部即恤刑河南公舉歐陽崇公語我為死者求生求生不

得我與死者兩無憾以微諷比部時有一用斧殺人事公
潛以用字改用字曰姑易一字以全一命乎其宅心仁厚
如此嘉靖癸丑島賊內訌上海議築城巨室以屢價高多
梗議公獨奮然先撤屋輸地于官城完公破產居多囊貲
亦罄公遂絕意進取闕一舍題曰容齋日箕踞吟詠其中
常曰我無他過人獨于人無所不容事至物來情恕理遣
訐侮寧及我哉人以是服公度量云公學博行高乃以數
奇屢蹶當分宜柄國或勸公往謁美官可立得也公愀然

曰士固有命吾豈以干謁取榮耶後世廟登遐覃恩宇內
部使者列上公行例授銜河南光州判從公卹刑有惠政
故也壽考而終海上稱為耆碩

董體仁

體仁字元善號海觀以子貴封南京工部侍郎公沉毅博
洽早歲試博士輒高等竟蹇一第年四十餘應補鄉貢推
讓其同儕之老而貧者士論咸高其義時公伯子傳策已
成進士直聲振海內公恬淡自如一不為意每憐族黨貧

苦為置義田若干贍之有范希文之風馬仲子晉舉隆慶
丁卯鄉薦季子傳文廩學宮皆一時名士

袁福徵

福徵字履善號太冲公誕時封公夢狀元錢福造其第故
名福徵初號潛冲一夕公夢左思語曰君即吾後身也因
更號太冲束髮廩學宮舉嘉靖甲辰進士初授比部主政
論北地囚庚戌晉為即時肅皇帝誅丁大司馬怒諸曹即
公袖短疏職方郎王某無罪奉旨編為民去遂名動公

卿間已出守復州里後負漁課者祖孫繼死篋楚下公捐
羨錙立出之移貳齊安其屬邑麻城有柴山連亘二百餘
里劇寇萬種公潛師夜進悉殲之民至今立祠祀焉會丁
父艱服闋起貳隴岷、近西番國公以孤臣走萬里絕塞
一意拊循甫五月左遷傳南陽王、甫辮髮國母垂簾諸
軍校為豪魁者乾沒莊即孱弱不能令公至則搜剔奸蠹
悉按以法人不敢犯藩府故事有左右長史視殿閣臣有
正副承奉視司禮監承奉員缺例于府中以次補陞疏名

奏請無自內出者兩閣監某、詐為王疏以聞下宗伯
議令之官非特旨也公廉其實具揭科部及撫按兩臺題
叅偽狀縛詣闕廷杖之以是忤中貴褫職歸居恒日以詩
文碁酒自娛凡里中顯晦少長皆為忘年忘分之交絕無
軒冕俗態時客遊吳越金陵山水間終歲忘歸與太倉王
元美北地李于鱗並馳名海內元美常贈公以詩曰蒼顏
此日圍棋叟青鬢當年同舍郎出僅一身何假鍾行逾千
里不費糧未論緇素皆親屬總得河山即故鄉似爾蕭疎

吾亦易檻猿籠鳥更茫茫真得公實錄云公文法顏延之
詩具體杜工部行草得蘇長公真趣有著作數千帙藏於
家

張仲山

仲山字仁卿號五鹿公雋資邃學為先輩徐獻忠所推轂
食廩學宮有聲性至孝所受弟子束帛即以備旨隨奉親
伯仲君皆食貧公推父產之腴者贍之而以瘠自居已伯
仲中廢并取瘠者公亦不為意伯常以逋被繫公色動曰

吾壁立且甘之耳忍繫兄耶傾囊出之待宗族姻黨務敦
厚道所教授弟子皆為名士有西河之風識者咸期公為
大器竟阨於例不及貢有司數上公材行部使者相繼下
書旌其門邑令屠長卿輩延為鄉飲大賓同志者播之詩
歌以彰其美有紳衿誦義錄

范叔子曰予讀唐史見牛弘弟弼嗜酒而酗射殺弘駕車
牛夫人迎謂曰叔射殺牛大是異事弘曰已知讀書自若
嗟乎有兄如此雖有長舌將安施焉余觀五鹿君推恩伯

仲有古人風而朱孺人率能以義佐之其子善又能世公
家聲提身淳厚如受徐長孺托孤周旋懇至即朱文季不
負張堪知己之言周仁榮善體楊公道假宅之意曷以尚
馬故予觀五鹿君之刑于而知其賢於人遠矣

楊有為

有為字後可號九南舉嘉靖己酉鄉薦公處奔競紛華之
世獨能狷介自持壬辰長至日前遘微疾沐浴更衣而逝
以貧不能葬孝廉張齊賢為文求助於郡中縉紳其詞曰

廉侔陳仲貧過原思生平惟守一編家業空餘四壁足絕
公署當道至不識其姓名高卧窮村交游莫得望其顏色
寧甘凍餓特耻干求生之年常并日而餐死之日至藁棺
而殮又况天乎不弔終奪伯道之孤室有未亡堪憐黔婁
之婦凡我同類誰不關情擬捐厚賻之資以儲薄葬之備
言：皆公實錄讀者哀之

莫雲卿

雲卿初名是龍字廷韓號後朋即方伯如忠伯子也公賦

質岐穎蚤歲能文日誦記數千言稍長即攻古詩文詞賦
有倚馬才律宗杜工部文法西京尤長於書畫行草得米
南宮真趣間寫張旭畫宗黃公望皆為世所珍公性豪舉
不拘小節嘗嗜弈終夜較不倦有相知雅好潔者邀坐斗
室中焚香煮茗兼供嘉膳輒盪忘歸與先輩文徵明唐
伯虎臭味相埒絕無松人俗態以拔貢授國子生名重都
下歸則杜門著述不事干請生平矜恤貧士傲睨富貴人
間或陰植親友亦絕不令人知方以學行立幟吳下倏遘

疾而亡聞者浩嘆所著有筆楮及廷韓集藏於家

范叔子曰廷韓以曠世逸才竟塞一第時或使酒罵坐以
舒不平予常從間解之曰足下抱千秋業當是宇宙內第
一等人何有於此輩哉廷韓深服予言時遇辱推獎一日
吳門王伯谷薄暮抵諸宜甫齋宜甫邀予陪飲有兩春元
不速而至同席久之聞暮鐘將散去適廷韓泛酒龍潭歸
頗有意宜甫因攜一妓及諸友偕來擬取醉遇伯谷兩春
元若不懌甫舉杯忽把余臂語伯谷曰足下知吾松此君

乎伯谷云素與余善廷韓曰此君食貧苦學坐中富貴人
不足敬可敬者此君耳予復戲解之曰莫大得無病酒痴
作故態耶嗟、今雖欲再覩廷韓狂態不可得矣故廷韓
死予每哭之失聲廷韓平生鄙牙籌會計惟蓄圖書數千
卷及古名人字畫數千幅年甫半百倏焉長逝內未寒妻
女遭暴疾相繼死僅遺一孤笑、子立幸長女適潘方伯
季子雲騃卜地海上葬之著作多湮沒不傳嗚呼何天之
不仁於廷韓乃爾哉

朱朝貞

朝貞字孟元號中宇家藏宋譜乘實晦翁先生之裔公王
父諱昂者以平蠻奇功為武廟時名御史父孝廉公諱承
祊者與郡中莊小山周萊峰二三先生締筆研水蘂之交
鄉薦四十餘年囊橐如洗公淵源家學少為邑庠南雍宮
弟子聲噪起數奇九躓棘闈嘆曰大丈夫安能雌伏然何可
奪司命者權吾每寤寐李永~~和~~擁書萬卷不假南面百城
也遂棄去公車業窮日夜為囊帙蠹魚蕪咀茹釋氏諸書

間與衲子話無生或偕騷侶選勝吟眺偶語及著作曰文
必東西京可無辱子墨客卿詩必開元大曆可無卑宮商
乃其才足辨耳為人悃悃坦衷然落落寡合不喜遨遊大
人先生市蜉蝣之譽嘗謂古逸民如冥鴻野鶴莫可籠罾
今奈何林泉于朝市煦濡于軒冕此又何如終南捷徑耶
乃著胡盧篇以見志并踏雪草蚊賦行于世武丘吟州瑣
言織爲集藏于家

俞顯卿

顯卿字子如號適軒成萬曆癸未進士授刑部主政公遂
于理學裨身嚴毅早歲舉孝廉即留心民瘼有范希文先
憂後樂之志 穆廟末年奸民誣告絕田牽連騷擾幾至
煽亂公為呈詞令耆民羅奉等抄呈巡撫張佳胤具奏停
止民賴以安已公立 朝會一勲戚與公同官者褻慢不
經公抗疏論之坐誣掛冠家居杜門清修敦尚孝友執父
喪蔬食三載復鬻園以成葬禮士論高之
范叔子曰始于闡鄰卒于金虎果哉先民之畏比周也公

獨不念此乎且夫肩鴻鉅者必有所忍乃克有濟公不能
隱忍于一時以需公論之自定亦亟矣哉雖然天下無兩
是亦無兩非以公之疏而黜其人即以公之疏而并黜公
也果孰是而孰非耶時事可知矣

徐益孫

益孫字長孺號與偕公少孤十歲喪父奉貞母陸孺人教
日下惟讀書厥有成立年十七補博士已入游國子名傾
都下所至公卿大夫比于黃叔度云事母至孝居恒教授

弟子束修皆以供肥羸母死遂絕意進取捐太學符繻焚
之示不復出結廬墓側昕夕悲慟郡邑大夫請上其事以
旌異公辭益力其奏記有曰益孫既賴母以成身當立身
以報母不能揚名以慰母何忍借母以竊名未能從殞已
是偷生莫可抒哀敢希牽進反覆三思只欠一死讀者比
于陳情表云年未半百而卒衆共惜之

陸郊

郊字子野號三浦公貌古行高常貧不自給怡然趺坐讀

書臨摹古人法書名畫以自樂前後監司守令熟公名者
時，欲交權公，不屑也。董宗伯傳策為國學博時，疏論
嵩相謫戍廣西，諸名公哀詩送之。獨公詩有千言，抗疏緣
明主萬里從軍，奈老親之句，為人所膾炙。云公詩法陶徵
君孟襄，易書法虞世南，顏清臣，俱得其骨。所著有子野集
行于世。

陸應陽

應陽字伯生，號古塘，即三浦公子也。公少負雋才，甫弱冠

即長于古文詩詞，真州書法顏魯公，間寫歐陽詢索者，嘗
滿戶外。詩宗大曆，文宗曾王平生，熱腸坦腹，善赴人緩急，
乃無端坐友人事，詿誤衆皆扼腕，每傷古道，日偷士風，不
振力欲挽回，狂瀾逞，形之意氣激烈，而位卑言高，動罹
薄俗非笑，公亦不為意。客游南北十餘年，足跡幾半天下，
縉紳公聞雲間，陸伯生至，輒倒屣傾蓋，公益自珍絕，不干
以私，興甚豪舉，嘗自傷數奇，不為造物所憫，則舉杯而問
之曰：天乎！天乎！何使陸生至此！故公客長安，有詩文名，有

捐介名有酒人名且為申許二相公所推轂足稱雲間高士所著有游燕集行于世尚有廣輿記樵史

范叔子曰伯生與予同游黌序即督學耿公所取士也其間奮翼巍科者幾二十人獨予與伯生為老博士然皆能以古文詞表見于世伯生猶善客游其所歷覽名山大川逞賦之詩歌以摠其牢騷拂鬱之氣亦雄矣哉乃所謂奮翼巍科者先夭折四五人與艸木同腐者又幾七八人倘以吾兩人較之昌黎氏所謂孰得孰失必有能辨之者

乎

余采

采字元亮號秀州先世方正學先生之後草除間避居海上公剛毅有志操面折不容人過亦不妄取人一錢庠中後進望若嚴師常與嫠士同舟其人道卒公出貨殮之終不責報倭亂時寓郡城每同家君閒步忽遇少婦冶容者公即面壁避之家君問其故公荅曰目不視邪色其生平嚴正類如此僅以需貢作教監立多名士云

朱察卿

察卿字邦憲號醉石公早歲即厭薄經生志在不朽業事母兄孝敬備至生平重干進多義俠有監軍使者故常德其父福州守豹風使奏謁當以軍功起家公謝去族人寒士待公舉火者傾橐濟之無吝容王司寇鳳洲常比公郭林宗徐孺子云公銳情著述文遍西京五七言詩婉麗爾雅具體錢劉有邦憲集十五卷行于世

張昉

昉字元曼號友蓮公負雋才力貧苦學文宗歐曾五七言詩典則有大曆風尤長于選真草書臨摹山水皆得晉元風骨性不嗜從王公大人市蟬蛸之譽故行年七十無所知名邑令屠長卿思一見其人先索書畫手卷以贖金三兩為壽公謝卻之卒不往見蕭然一身不能接餽陸大行彥章為假居僧寮一椽時佐酒米公曰此賢者之惠也不妨吾廉郡人兩高之

范叔子曰身將隱矣馬用文之古人重高士良有以也今

之托名山人者何比，哉乃迹寄林泉心懸富貴且暮奔
走射利沽名而叩其中且空，無當于用是陽慕山人而
陰濟其小人之私也媿之矣媿之矣予觀昉之才藝足稱
名家乃能隱約沒齒不求聞達即以方之爰旌木鮑焦諸
賢寧甘立稿獨恥干求者奚讓焉故予每見昉必稱曰真
山人

張重華

重華字虞侯號晴陽子先世自莊懿公而下世以科第雄

于郡中君幼時即岐嶷不群弱冠下帷遍讀六經諸子旁
及玄釋稗官不歷覽者遂以詩文名世選體宗李杜變
體律法岑王文出入魏晉喜工八法唐碑宋珉臨摹殆遍
君既才高多藝方芥視一第竟五困南都試君不勝扼腕
遺書余曰不佞弱冠讀書好古文詞五上公車猶然故吾
今且放浪形骸脫落淄垢有四方五岳之志行游齊魯燕
晉間幸臭味之士地有其人今秋且入洛入秦觀竒弔古
足其生平業已無意人間腐鼠矣余讀而悲之君名籍

海內足跡所至縉紳學士亡不倒屣愿把臂入林然于聲
華淡然絕不借貴遊取重砥礪檢節以古人自期待張孝
廉齊顏目之曰寸心既許百折難回一諾初成千金勿改
其為儕輩所推類如此所著滄溟集南北遊草及石刻行
于世

孫得原

得原字本卿號雁洲公少有俊才治舉子業二十而病羸
支離一床者五年遂棄去故業以詩歌自娛尤工篆隸雜

楷縉紳間絕愛重之時、籃輿過公說詩問奇公以病足
不能行縉紳遂醵錢買一蹇驢給之郡中故無騎驢者騎
驢自公始故驢跡所至兒童婦女皆呼策驢山人云公又
以孝稱事母魏孺人雖晚年猶依、膝前孺子慕也詩有
黃山谷蘇東坡遺音精舍一椽左圖右史者四十餘年而
卒

陸中行

中行字伯與號家山公弱冠補博士即究心濂洛閩閩之

學而旁及于內外陰陽九流諸子百家莫為通儒已慕太
史氏遨遊四方之志擊楫渡江走桑乾太行歷燕秦晉魏
故墟弔古偉人傑士之墓欲從武弁中當一面以試其奇
會數奇敝裘帶索以歸築室于放鶴灘雜植名花怪石箕
踞吟嘯其中所詠有不羈天地濶無事日月長之語公多
巧思常製一畫舫外列文象內具茶鐺酒灶六博棋枰之
屬每乘舫探奇雖窮鄉兒婦咸嘖嘖呼為家山先生公善
琴又工樂府興至輒浮白浩歌幾失天地自比于嵇中散

桓江州云晚年會馮廷尉公季子敏卿舉進士為兵部郎
即公表弟也一日顧謂妻子曰天豈真虛生我耶吾氣尚壯
不忘擊筑探丸之懷矧有弟在燕中吾將一往得盡交天
下賢豪長者而幸于一遇庶不負此生其如征橐罄何乃
出所幸姬鬻之策劍趣長安竟無有知公者因窮愁旅邸
以死敏卿聊為脫駝扶襯歸之識者扼腕

范叔子曰予嘗讀王文成公瘞埋文見一吏目携一子一
僕赴官于烟瘴毒癘之鄉三人一朝死于途時文成公謫

為驛吏命童子持鐘往瘞之因為文欲招其游魂而還之
故鄉又悲所謂吏目者即偕子僕食力于家未必凍餓以
死何至狗升斗之祿而死非命乎夫吏目狗升斗之祿以
死文成公猶且悲之今家山先生所狗者安在哉而乃同
于吏目之死非命也假令文成公目覩先生之變其為悽
愴之詞以弔又可知矣予今老矣平生坎坷大都與家山
同獨能以義命自安而不役于窮途自謂加家山一等
云

倪邦彥

邦彥字伯獻號藹寰綺歲即沉静好學志操不群弱冠由
博士入貲為國學生以數奇入躋棘闈遂謁選授光祿大
官丞會 穆廟覃恩得封乃考新溪公有子甫英業領順
天鄉薦公喜曰親沾寵命子列賢書可自慰矣奚必躋巍
陟臚為也旋擢桂林別駕即致政歸居鄉嫉俗之誇嚴蕩
軌淫窳澆墮欲以古道力挽之因更號一漑子取稔中散
所謂為稼于湯之世必一漑者后枯之義也以故賑貧恤

孤不惜傾橐有平仲希文之風島寇起海上議城役兵與
有司計無所出公首義曰卜式賈人子耳猶能為縣官輸
粟實邊况吾輩耶即捐貲佐之時里中幸免倭患實推公
之功居多公嘗訪應休璉之義作百一感 篇行于世唐
太史文獻讀之比于蟋蟀簡兮諸篇識者服其知言云今
孝廉公益樹懿行聲籍士林人稱為仁者之後

錢廉

廉字貞夫號介石吳越武肅王裔公性嗜學雖治詩然易

書禮左氏春秋無不精研皆誦無漏弱冠補博士試輒高
等竟八困棘試督學楊公嘗手其卷嘆曰子其文中李廣
乎僅以應貢得豐城教尋轉會稽公訓士以經學為先士
皆驚詫曰公豈康成夏侯高唐公毅合為一人乎再轉教
授鄴臺鄴臺必走陸可至而公事母沈孺人至孝時孺人
春秋高公嘆曰昔王陽迴馭非以親故耶吾奈何忍挾母
氏陸走黃塵以苟升斗也遂投劾歸生平醞謹專慤不與
物忤雖御子弟童僕未嘗輕加迅厲所著作甚富子姓皆

奉公命不付劊劊以是無傳者病篤猶無日不晨起櫛沐
衣冠談書史一日命其子良輔良軫講鄒孟孔子登東山
章極言紫陽訓詁語已得曹溪汗下悟矣竟掩卷端坐拱
手而逝已復徐開目曰死生之際其究竟若此哉遂歿人
以為公得蟬蛻云

陸從大

從大字履貞號寶峰有雋才弱冠即以儒士領嘉靖丁酉
鄉薦辛丑成進士補福清令值海溢民飢捐俸賑之歲大

旱禱雨輒應士民哀公所作喜雨頌及民間謳歌為如
却錄行于世時守令未有久任者公獨以士民借寇衆令
清七年始轉廷評尋陞禮膳主事會 廷推公妙詞翰遂
奉 旨同張某等七人更直 制勅蓋一時異數云竟以
京師大疫天子官董義好施不啻飢渴有同年孫某謁選
客亾公脫駮賻之歸其二子里人張某者遊閩中訪故舊
黜不納幾乞于市公官其地哀而收之捐俸三十金為治
裝歸內戚某嘗以產售公伺公之官輒復手其產公亦不

為計以故捐館之日官橐如洗時論高之所著有詩文如
千卷藏于家

范叔子曰張某困閩中事父老至今能道之然皆稔稱公
而切齒其斥張者時公乃天而遺孤彼其子方貴且盛矣
倘所謂無天者非耶未幾而斥張者赤族之禍起公二子
曰萬言萬里者竟崛起襁褓克紹公家聲而孝廉君孝友
之德尤光里閭嗟々孰謂天道果遠乎哉

潘允哲

允哲字伯明號衡齋登乙丑進士為新蔡令高等調煩義
烏令圉圉中縲囚為空青草蔽地徵為南御史所建白大
計皆著為令守齊安民嚴之如鬼神擢副使督學閩中故
事外臣不得乞休沐假公一日從郵中得父恭定公手書
語多失詮次公心動曰翁其始乎即解印綬歸同官者覺
而覓公則跨一款段出閩久矣中途果聞訃哀毀骨立未
抵家五十里輒號咷而前哀動道路其治母夫人之喪亦
然家居布衣蔬食遇者不知其為憲副公也人有緩急于

有司屬公居間者公陽却之而陰為緩頰白見寃狀不令
其人知也人或竊知從公謝者公輒面赤遜無有也應門
傳刺僅一老蒼頭仕宦二十餘年又為恭定公元子家徒
壁立戊子歲稔米價騰踊公時不給以故鄉黨間無不
頌公者卒之日知與不知皆為流涕丹旄所過父老爭揮
竹掛帑錢其上自公家達墓所凡二十餘里家至戶到又
共為詩謠集諸子弟歌為隻微聲以佐薤露其詞曰民有
秉彝原好德長公雅度何溫克蚤歲賢聲徧鄉國既登朝

貴無驕色身章悃悃厭華飾禮度謙心翼公之存兮
共矜式公之歿兮咸太息仕兮未躋樞鼎職齒兮未屆耄
耄域積之豐兮報之嗇胡天夢不可測竹枝森沿道
側紙錢飄豈易得三代民心此遺直音聲悽朗一唱百
和觀者填途塞巷至軹靈輶不得行其感人之深若此蓋
海上一盛事云

范叔子曰余所紀一時人物皆就其不得志于時者衡齋
公既以蚤歲登進士仕列金紫恭定公為之前方伯公為

之季于人生足矣則何以入紀也曰以志造物之變也以
志人心之猶古也余辱與方伯公友善得衡齊公隱德為
詳以公之德即官至台鼎壽躋耄耄何所不可乃祿不配
德壽不配名悲矣余又觀吾鄉數年來風頑俗薄盜跖夷
齊逞、倒置而上海尤甚然公之喪也担夫紅女無不嘆
息泣下至挿竹之事幾足與雷陽並傳非所謂三代遺民
也耶余故重惜公且欲以公為世鏡也因捉筆紀之方伯
公宏于經濟朝野傾注與公同官橐如洗好行其德亦與

公同獨祿位稍顯晚年林壑自娛名壽方悠、未艾予故
未敢入紀云

山田村

卷一

一

一

律